



## KOMUNITI MUSLIM UNIVERSAL

*Kenyataan Media untuk Siaran Segera*

### **Pelaksanaan Dasar Perpaduan Negara 2021-2030 Perlu Lebih Menyeluruh**

**Kuala Lumpur, 19 Februari 2021:** Komuniti Muslim Universal (KMU Malaysia) mengikuti dengan dekat perkembangan pelancaran Dasar Perpaduan Negara (DPN) dan rangka tindakannya bagi tempoh 10 tahun mendatang. Tahniah diucapkan kepada Kementerian Perpaduan Negara!

Namun begitu, KMU Malaysia merasakan asas kepada dasar perpaduan baharu masih terikat kepada falsafah “Rukun Negara” yang sudah berumur 50 tahun sejak 1970 yang diperkenalkan ketika situasi darurat, serta tidak dibentuk oleh perkumpulan suara rakyat terbanyak dan tidak pernah dibahaskan secara kritikal dalam mana-mana persidangan Parlimen, harus dinilai kembali. Sementelah fabrik sosial Malaysia sudah banyak berubah sejak setengah abad lalu dan perlu kepada pengadaptasian semula. KMU Malaysia menegaskan, sesebuah falsafah negara yang ingin dianuti bersama mestilah dibentuk berasaskan suara kolektif seluruh rakyat yang pasti tinggi nilai pemilikan dan kebersamaan dalamnya.

Selain itu, hala tuju kepada identiti Bangsa Malaysia dilihat semakin kabur dan dilupakan. Walaupun setelah lebih 63 tahun kemerdekaan, penekanannya juga tidak selaras dengan pelaksanaan dasar negara dalam sistem pendidikan, ekonomi, politik dan perundangan yang tidak mengatasi masalah jurang berdasarkan kaum, etnik dan agama tertentu. KMU Malaysia mencadangkan untuk kerajaan mengarusperdanakan pelaksanaan identiti Bangsa Malaysia secara menyeluruh dalam sektor-sektor yang disebutkan bagi memastikan keberkesanan 3 objektif dasar dan 12 strategi DPN yang diperkenalkan ini.

Ditambah pula dengan penzahiran sentimen perkauman dan kebencian antara agama yang kian meruncing dalam beberapa insiden terbaru di ruang fizikal dan alam maya. Dengan itu, pada awal Februari 2021, KMU Malaysia telah melancarkan sebuah **Booklet Kempen #Kebersaamaan** dan membuat beberapa cadangan kepada kerajaan untuk menambah baik dasar bagi hubungan antara kaum dan agama di Malaysia. Antaranya ia menekankan tentang pengarusperdanaan dialog antara kaum dan agama, pendidikan inklusif, pengurusan konflik secara aman, dan pembaharuan undang-undang.

Perpaduan negara yang diidamkan tidak boleh dicapai dengan berkualiti dan berkesan jika ia tidak dilaksanakan dengan penuh iltizam oleh semua pihak dan dalam sistem sokongan yang lemah, meskipun secantik mana sesebuah dasar atas kertas. KMU Malaysia menekankan keperluan untuk berpaksikan keluhuran Perlembagaan Persekutuan dan kedaulatan undang-undang dalam pembuatan dasar. Ia juga mestilah dilakukan dengan libat urus bersama pelbagai pemegang taruh khususnya golongan rentan dan minoriti di semua peringkat.

KMU Malaysia selaku sebuah organisasi masyarakat sivil akan terus menjalankan tanggungjawab semak imbang dan bersedia menjadi rakan strategik kerajaan dalam melaksanakan usaha penting ini bagi sebuah perpaduan yang menyeluruh untuk jangka masa panjang.

- SEKIAN -

## **Mengenai KMU Malaysia**

Komuniti Muslim Universal (KMU Malaysia) ditubuhkan pada tahun 2015 oleh bekas belia yang telah teradikalisasi. Terinspirasi oleh pengalaman yang mengubah hidup mereka, KMU Malaysia ialah sebuah organisasi belia, keagamaan, kemasyarakatan dan hak asasi manusia merangkumi dan menyokong nilai-nilai al-Quran dan as-Sunnah seperti keadilan sosial dan kesamarataan untuk semua pada abad ke-21. Demi mencapai Matlamat Pembangunan Lestari (SDG) PBB 2030, KMU memfokuskan kepada, (1) Pencegahan dan Melawan Ekstremisme Ganas, (2) Kebebasan Beragama dan Berkepercayaan, (3) Hak-hak Wanita, dan (4) Pendidikan Seksualiti dan Gender.

Untuk pertanyaan lanjut, sila hubungi kami di [salam@kmumalaysia.org](mailto:salam@kmumalaysia.org)